

雲南通志



雲南通志



奏疏

本朝一

恭報克復雲南省城疏

巡撫

王繼文

奉天

竊照賊首吳世璠逆渠郭壯圖方光琛等自知罪大惡極死據孤城仰仗

皇上聖德弘仁天威廟算逆魄既褫悉伏誅殛自此梟獍餘氛掃除盡淨遐陬邊徼悉仰

照臨無不望

闕呼嵩歡聲雷動矣所有大將軍固山貝子征南大將軍臣賴塔發到偽金印金冊金匣金池併偽銀印等

件臣謹一面遴員押解送部查驗銷燬并克復省城  
日期情形均聽大將軍固山貝子等恭疏報聞外臣  
率同雲南布政司以下及臣標員文武各官入城閱  
視城池宣布

皇仁浩蕩撫恤被脅難民但向因賊糧久匱饑民相食今  
見饑殍載道枯骨盈衢羣逆兇殘一至於此其有氣  
息奄奄猶可全活者臣謹率各官共圖捐賑以副

皇上軫念滇民至意至於一切賊遺銀米并軍器砲藥等  
項容臣詳慎次第嚴查另疏

題報



請修河壩疏

王繼文

謹照雲南省城外東南舊有金汁等河從松華壩借水於盤龍江自嵩明州流入昆境遶城之北過雲津土橋趨入昆池兩岸築堤高二三丈不等而水流其中蜿蜒六十餘里有壩有閘又有過水涵洞蓋以積水灌田而城外數十萬頃皆藉此河之利民生

國賦均有攸賴焉自變亂之後沿河之堤埂壩閘未經修葺日久傾頽上年大兵困逆週圍壕塹不得不拆毀挑挖以致水利阻塞灌溉不通田畝荒蕪居民失業而昆明額賦莫可徵收自克城至今臣多方招徠

而流離之衆見此附郭膏腴咸成棄土未免徒倚他  
方趲趲不返哀此殘黎欲歸則無資生之策不歸則  
有溝壑之虞臣不得不早爲之計也夫以滇省軍餉  
取給外省頻經請撥仰厪

宸衷而昆邑應徵之賦可耕之田豈可坐視拋荒聽其虧  
額臣愚以爲河壩不修則殘黎勢難歸業荒田不墾  
則額賦無從徵收臣檄令地方官踏勘估計需用椿  
木闢枋灰石各項材料并匠作人夫等項約需銀萬  
餘兩查全書內開載歲修松華壩額銀八百兩每年  
十一月中起工至次年三月初止往例可稽似當亟

議興修以復民業然動支原額銀兩萬不敷用值今財用艱難工程浩費何敢於額外輕議請動正項錢糧臣議於通省官員及各屬土司酌行捐助甫定之區人方拮据非有以鼓勸之恐難必其樂輸伏查捐納各例業奉停止臣不敢復爲陳請惟是紀錄一款旣無礙於名器又可鼓其急公合無仰籲

皇恩勅部酌議捐銀若干准與紀錄仍比照各省往例量減額數庶衆擎易舉便於興修至工竣之日臣造冊送部照例敘錄則河壩固而水利可通俾四散之民咸圖歸計漸次開墾將見生聚寢昌而昆邑糧賦可



以望其復舊矣

請補行鄉試疏

總督 蔡毓榮 奉天

竊照滇省地方初復亟宜修舉廢墜收拾人心今兩  
迤之庶民未盡復業而士爲民望惟勸士乃可以得  
民卽一切修舉之中有政體所當先與望所甚切者  
莫如興賢大典我

皇上誕敷文治前此用兵之日猶復雅意掄才海內儒林  
爭相鼓舞獨滇南久阻聲教士氣鬱而未抒今旣出  
之沉淪重瞻

天日深山窮谷之士莫不引領觀光昨歲辛酉賓興旣格



於會城未復若復需之下屆甲子同各省一例舉行  
恐與目前收拾人心修舉廢墜之意殊有未協當此  
普天同慶而於遐荒新復之地尤宜

特沛殊恩伏祈

皇上俯念滇人士八載無聞三科未舉准以明年癸亥八  
月特行鄉試仍照順治十八年辛丑補庚子科之例  
暫行廣額俾才智之倫競赴功名之會榛蕪之境早  
開棧樸之光於以黼黻太平風示邊徼誠滇省今日  
之急務也

酌定全滇營制疏

蔡毓榮

滇省東接東川西連猛緬北距蒙番南達安南四圍  
邊險而中間百蠻錯處如獠獯焚民野苗等種類繁  
多最爲叵測故無任非險要之地無地不需控馭之  
兵臣等量地設防從長佈置務使無事分扼要害有  
事犄角相援然後可經久而無患如迤西舊設三鎮  
內鶴麗一鎮逼臨西域控制金江獨當一面自應復  
設仍駐鶴慶永順一鎮守在天末地交緬甸并屬要  
區自應復設仍駐永昌查永順鎮兼轄之騰越一協  
順雲城守一營今遵部議復設無庸更議鶴麗鎮江  
汛綿邈緊隘甚多設兵二千四百僅足濱江守禦二

郡彈壓其他要汛勢難兼顧查劍川州逼近石鼓一帶地方界接蒙番爲迤西藩籬要地應設協守副將一員守備一員千把總六員兵一千名駐劄劍川聽鶴麗鎮兼轄扼迤西之門戶壯鶴麗之聲援所最急也永北一鎮原由楚姚蒙景改爲鶴麗永北旣又由鶴麗分爲永北彼時楚雄設有援剿前鎮洱海設有援剿後鎮故永北鎮與北勝協同駐州城今援剿鎮營旣裁則楚雄乃迤西九府咽喉且左有蒙化景東右有姚安接通建會而楚屬南安等處又係野賊剽劫之鄉誠爲喫緊應以永北鎮改爲楚姚蒙景鎮移



駐楚雄控制姚安景東蒙化以北勝協改爲永北協  
仍駐北勝州控制永寧土府并歸鶴麗鎮兼轄以一  
邊汛之事權而資環江之調度其洱海當迤西孔道  
楚姚蒙景鎮統轄四府鞭長不及若非另設官兵則  
一路塘汛虛懸而地方廣野無備應設參將一員守  
備一員千把總六員兵一千名駐劄洱海聽楚姚蒙  
景鎮兼轄爲表裏之捍禦通內外之呼吸又最急也  
迤東舊設四鎮內開化一鎮向以羈縻之域改爲節  
制之區叢山深箐接通交趾最稱邊隘亟賴重兵自  
應復設仍駐開化臨元澂江一鎮當四達之要會控



三府之遐陬苗蠻錯雜難防野賊出沒爲患自應復設仍駐臨安查開化鎮向無兼轄協營臨元徵江鎮兼轄之元江一協新習守備一營今遵部議復設無庸更議曲尋武霑一鎮向駐尋甸控制曲武二府霑益一州復因汎廣隘多土司黠悍故武定仍設援剿左鎮曲靖仍設援剿右鎮今旣奉裁則曲靖乃黔楚通衢滇中東北門戶應將曲尋武霑鎮移駐曲靖但自曲至尋一路險僻自易隆抵普安衛數站要衝而尋城密邇東川有樹撒秧田功山矣吳打烏等十數隘口俱關利害雖有兼轄之尋霑遊擊一營而霑汎

荒廣猶苦兵單計合鎮營之兵不能兼顧武定查武定接通建會有他頗普度撒馬等隘而祿勸則連撒甸保羅元謀則通金江有矣資等隘亟須守險且武汛上至祿豐接楚雄之塘下至安寧接雲南城守之塘若不另設官兵何以分汛應亟設叅將一員守備一員千把總六員兵一千名駐劄武定并聽曲尋武霑鎮兼轄謹東北之藩籬爲曲尋之指臂又最急也廣羅一鎮原駐羅平控制廣西廣南均屬要地但前六鎮旣已難裁故臣等於無可裁之中仰遵 廷議酌量裁此一鎮惟是各鎮勢難兼併而一州二府未

便聽其甌脫且羅平路通黔粵汎接安籠四境遼闊  
彌勒十八寨爲土夷之藪時有跳梁應改設協守副  
將一員守備一員千把總六員兵一千二百名仍駐

羅平兼控廣西其廣南瘴癘之區直接泗城思恩等  
處而販朝販順富州一帶儂人野類叛服不常且由  
販朝以達架村直通交趾協兵未能兼制應設遊擊  
一員守備一員千把總六員兵八百名駐劄廣南聽  
羅平協兼轄此又視鎮兵較減而於各地必需者也  
以上除六鎮暨原設協營之外凡應改設增設官兵  
皆臣等身在地方審量形勢萬難缺少使其間稍有



可輕可緩之處又何敢糜有用之餉安置無益之兵  
且雖有增設之名而較之滇省舊日官兵已多減省  
亟請

皇上俯鑒邊圉初復非比腹地承平既久可以輕議裁兵  
之時務期佈置萬全

特允臣等所請早定經制於以建威消萌久安長治無難  
矣

籌滇第一疏

請蠲荒

蔡毓榮

竊照滇爲逆踞歷有八年土地人民豈能依然如故

一自

天戈南指凡我遺黎踴躍趨事各各飛芻輓粟以供數十萬之師豈果力無不逮與彼其黽勉急公亦冀幸新恩之不旋踵而下也今弊政悉與革除康熙二十年夏稅已蒙蠲免

皇上沛如天之仁宜邊疆獲更生之樂矣無如積患既深療治匪易去歲軍需頓急徧行召買米價日貴賠累日多故名買已倍於正供而運費更浮於米價每運米一石輒費至二三石不等每協夫一名月需工食銀十數兩不等民之困敝已極米亦搜括無遺數月之間斗米三兩無從購買頃者麥秋既屆而去冬播